

प्रधानमंत्री नरेन्द्र मोदी देश रा 9 करोड़ 44 लाख ऊँ बत्ता किसानां रा खातां मांय पीएम किसान सम्मान निधि रा तैत 18 हजार 880 करोड़ रुपयां भेज्या।

मुख्य चुनाव आयुक्त ज्ञानेश कुमार देश री चुनावी प्रक्रिया ने भरोसेमंद अर साफ-सुथरी बतायी-जयपुर मांय बीएलओ संवाद कार्यक्रम मांय शामिल व्ह्या।

नीट यूजी 2026 परीक्षा काल ओजू ली जावेला- देशभर मांय आज पुख्ता इंतजामात री परख करी ज्यी।

12वां अंतर्राष्ट्रीय योग दिवस काल मणायो जावेला-राज्य स्तर रो कार्यक्रम आबूराज मांय व्हेला।

000

प्रधानमंत्री नरेन्द्र मोदी आज देश रा 9 करोड़ 44 लाख ऊँ बत्ता किसानां रा बैंक खातां मांय पीएम किसान सम्मान निधि री 23वीं किस्त रा तौर ऊँ 18 हजार 880 करोड़ रुपया ऊँ बत्ती रकम भेजी। पश्चित बंगाल रा तारकेश्वर मांय राख्यी ज्या कार्यक्रम मांय प्रधानमंत्री आ रकम भेजी। ई मौके वे किसानां रा भला रो सरकार रो संकल्प दोहरायो।

.....

पीएम किसान सम्मान निधि रा तैत रकम जारी करण रो राज्य स्तर रो कार्यक्रम पाली ज़िला रा सुमेरपुर मांय राख्यी ज्यो। पीएम किसान उत्सव रे जरिये प्रदेश रा 66 हजार ऊँ बत्ता किसानां रा खातां मांय रुपया भेजी ज्या। पात्र जनता रा बैंक खातां मांय रकम भेजण री दुनिया री मोटी योजनावां मांय शामिल पीएम किसान सम्मान निधि रा तैत हाल ताई किसानां रा खातां मांय 4 लाख 28 हजार करोड़ रुपया ऊँ बत्ती रकम भेजी जा चुकी है। पीएम किसान सम्मान निधि रा तैत पात्र किसानां ने हार साल 6 हजार रुपयां री मदद दी जावे है। राज्य स्तर पर कार्यक्रम मांय मुख्यमंत्री भजनलाल शर्मा ई शामिल व्ह्या। इण ऊँ पैली मुख्यमंत्री पाली ज़िला रा नेतरा मांय लगायी ज्या ग्रामीण सेवा शिविर रो जायज़ो लीनो। ई मौके वे कह्यो के राज्य सरकार गांवांई हलकां मांय विकास सारू लगातार काम कर रही है। श्री शर्मा जनता ऊँ ग्रामीण अर शहरी सेवा शिविरां रो बत्तो ऊँ बत्तो फायदो लेवण री अरज कीनी।

.....

वे न्यारी-न्यारी स्टाल्स माथे सरकारी योजनावां रो फायदो लेवण वाळां सागे बातचीत ई कीनी।

000

प्रधानमंत्री नरेन्द्र मोदी रो काल कोलकाता मांय नौसेना सारू देश मांय बणायी ज्या तीन जहाज-आईएनएस दुनागिरी, आईएनएस संशोधक अर आईएनएस अग्रय ने पाणी मांय उतारण रो कार्यक्रम है। आं ने समुद्री हिफाजत, सर्वे अर पनडुब्बियां रे खिलाफ न्यारा-न्यारा अभियान मांय काम लिया जावेला। नौसेना रे मुजब, अ जंगी जहाज बणावण रा काम मांय 200 ऊँ बत्ती एम.एस.एम.ई. इकाइयां योगदान दीनो।

000

केंद्र सरकार 16 भांत री फिक्स्ड डोज कॉम्बिनेशन-एफडीसी दवाइयां बणावण बेचण माथे तुरत रोक लगा दीनी है। सुप्रीम कोर्ट रा हुकम पाछे जाणकारां री समिति कानी ऊँ करी ज्यी सिफारिश पाछे ओ फैसलो करी ज्यो। समिति रे मुजब आं दवाइयां ऊँ स्वास्थ्य संबंधी जोखिम व्हेवण री शंका है। स्वास्थ्य अर परिवार कल्याण मंत्रालय राज्यां रा औषिधी नियामकां अर संबंधित एजेंसियां ने करडाई ऊँ रोक लगावण रा हुकम दीना है।

000

मुख्य चुनाव आयुक्त ज्ञानेश कुमार कह्यो है के भारत री साफगोई सागे निपख चुनाव प्रक्रिया माथे देश रा हर रहवासी ने नाज है। वे आज जयपुर मांय खबरनवीसा सागे बातचीत कर रह्या हा। मुख्य चुनाव आयुक्त कह्यो के देश रा भरोसेमंद चुनाव प्रबंधन ने दुनिया मान्यो है।

.....

मुख्य चुनाव आयुक्त आज जयपुर मांय प्रदेश रा बूथ लेवल रा अहलकारां अर पर्यवेक्षकां सागे बातचीत कीनी। ई दौरान वे 12 राज्यां मांय व्ह्या एसआईआर रा काम मांय राजस्थान ने अब्बल बणावण मांय बूथ लेवल अहलकारां रा काम री सराहवणा कीनी। वे बुनियादी चुनौतियां रा बारा मांय बी.एल.ओ. अर सुपरवाइजरां रा सुझाव अर अनुभव ई सुण्या।

000

नीट-यूजी 2026 परीक्षा काल ओजू व्हेला। इण ने ठीक तरीका ऊँ अर साफगोई सागे करावण सारू राष्ट्रीय परीक्षा एजेंसी आज तैयारियां री परख कीनी। इण मांय अढाई लाख ऊँ बत्ता सुरक्षाकर्मचारी शामिल व्ह्या। एन.टी.ए. रे मुजब नीट-यूजी री परीक्षा देश रा 551 शहरां अर परदेश मांय 14 ठौडा ओजू ली जावेला, जिण मांय 22 लाख 79 हजार ऊँ बत्ता विद्यार्थी शामिल व्हेला। परीक्षा ने ध्यान राखता थकां सोशल मीडिया प्लेटफॉर्म टेलीग्राम माथे 22 जून तांई रोक रहवेला। ओजू ली जा रही नीट यूजी परीक्षा सारू प्रदेश मांय 25 ज़िलां मांय 577 सेन्टर बणायी ज्या है। राज्य मांय करीब 2 लाख 9 हजार उम्मीदवार आ परीक्षा देवेला। परीक्षा साफगोई करावण सारू पुलिस, प्रशासन, एसओजी अर आईबी पूरी तरह सावचेत है अर सीआरपीएफ री ओर ऊँ हिफाज़त रा पुख्ता बंदोबस्त करी ज्या है।

000

प्रदेश मांय साफ, सुरक्षित अर सुगम सार्वजनिक परिवहन ने बधावो देवण सारू पहली दफ़ा बिजली ऊँ चालण वाळी बसां चलायी जावेला। प्रधानमंत्री ई बस सेवा रा तैत मुख्यमंत्री भजनलाल शर्मा आज जयपुर ऊँ 47 ई-बसां ने हरी झंडी बता र रवाना कीनी। अमर जवान ज्योति माथे राख्यी ज्या ई कार्यक्रम मांय 29 बसां राजधानी जयपुर अर 18 बसां भीलवाड़ा ने दीरीजी है। ई मौके मुख्यमंत्री कह्यो के ई-बसां ऊँ हवा मांय गन्दगी कम घुळेला। श्री शर्मा ई-बस मांय अमर जवान ज्योति ऊँ स्टेट हेंगर तांई सफर ई कीनो। ध्यानजोग है के पीएम ई बस योजना रा तैत प्रदेश ने साढे 11 सौ बसां दी जावेली। योजना रा पहला दौर मांय प्रदेश रा 8 ज़िलां मांय 675 ई-बसां चलायी जावेला।

000

रेल मंत्री अश्विनी वैष्णव रो काल बीकानेर रा दौरा रो कार्यक्रम है। वे लालगढ़-साबरमती एक्सप्रेस रेलगाड़ी ने हरी झंडी बता र रवाना करेला। ई गाड़ी ऊँ गुजरात अर राजस्थान मांय सैर-सपाटा री खास-खास ठौडां सीधो संपर्क व्हे सकेलार्। इं पाछे केन्द्रीय मंत्री जयपुर पूग र खातीपुरा रेलवे टेशन ऊँ जयपुर-दरभंगा अमृत भारत एक्सप्रेस रेलगाड़ी ने रवाना करेला। श्री वैष्णव रो खातीपुरा टेशन माथे मेगा काचिंग टर्मिनल रो उद्घाटन करण रो ई कार्यक्रम है। श्री वैष्णव 41 नन्हा अर मझोला टेशनां माथे प्लेटफॉर्म ने मोटा बणावण रा काम अर 16 टेशनां माथे एकीकृत यात्री सूचना प्रणाली ई जनता ने

सूंपेला। वां रो प्रदेश रा न्यारा-न्यारा रेलवे टेशनां माथे मुसाफिरां सारू विकसित करी ज्या सुबीता जनता ने सूपण रो ई कार्यक्रम है।

000

12वां अंतर्राष्ट्रीय योग दिवस काल मणायो जावेला। इण रो ई साल रो मुद्दो “स्वस्थ आयु के लिए योग” राख्यी ज्यो है। भारत सागे आखी दुनिया मांय योग दिवस मनावण रे दौरान परदेश मांय भारत रा 200 ऊँ बत्ता दूतावासां मांय ई योग सत्र राख्या जावेला। राष्ट्रीय स्तर रो कार्यक्रम प्रधानमंत्री नरेन्द्र मोदी री अगुवाई मांय कोलकाता मांय राख्यो जावेला। ई बीचे आयुष राज्य मंत्री प्रताप राव जाधव बतायो के सरकार काम री ठौड़ां माथे योग करण बाबत् थोडी देर री छुट्टी सारू वाई ब्रेक एप ई सरू करी ज्यी है। आयुष मंत्रालय री ओर ऊँ विकसित करी ज्या ई मोबाइल एप्लीकेशन ऊँ काम बीचे पांच मिनट री छुट्टी ले र योग कर र लोग खुद ने तरोताजा अर तनाव मुक्त कर सके है।

.....

प्रदेश मांय ई सगळा ज़िलां, ब्लाक अर ग्राम पंचायतां, स्कूल-कालेजां अर आयुष्मान आरोग्य मंदिरां मांय योग कार्यक्रम राख्या जावेला। अंतर्राष्ट्रीय योग दिवस रे मौके राज्य स्तर रो जळसो सिरोही ज़िला रा आबूराज मांय राख्यो जावेला। मुख्यमंत्री भजनलाल शर्मा रो ई इण मांय शामिल व्हेवण रो कार्यक्रम है। केन्द्रीय मंत्री अश्विनी वैष्णव बीकानेर रा करणी सिंह स्टेडियम मांय राख्या जावण वाळा योग दिवस कार्यक्रम मांय शामिल व्हेला। आयुष मंत्रालय री ओर ऊँ राजधानी जयपुर रा जंतर-मंतर मांय भेळो योगाभ्यास कार्यक्रम राख्यो जावेला। ई सागे ई एस.एम.एस. स्टेडियम, अल्बर्ट हॉल अर जलमहल समेत शहर री खास-खास ठौड़ां योगाभ्यास कार्यक्रम राख्या जावेला। ई बीचे 13 मार्च ऊँ नई दिल्ली ऊँ सरू करी ज्या 100 दिन रा अंतर्राष्ट्रीय योग दिवस काउंट डाउन कार्यक्रम रा तैत आखा राज्य मांय योग जागरुकता कार्यक्रम राख्या जा रह्या है। आज डीग अर जैसलमेर मांय योग जागरुकता रैली निकाळ र निरोगा रेहवण रो संदेश दियो ज्यो।

000